

## REGLUGERÐ

### um Sölustofnun lagmetisiðnaðarins.

#### A. Stjórn og rekstur.

##### 1. gr.

Heiti stofnunarinnar er Sölustofnun lagmetisiðnaðarins.

##### 2. gr.

Sölustofnun lagmetisiðnaðarins er sjálfstæð stofnun með sjálfstæðan fjárhag og reikningshald, lýtur sérstakri stjórn og heyrir undir iðnaðarráðherra. Heimili og varnarþing stofnunarinnar er í Reykjavík.

##### 3. gr.

Hlutverk Sölustofnunar lagmetisiðnaðarins er að efla á skipulegan hátt framleiðslu og útflutning á niðursoðnum og niðurlögðum sjávarafurðum, rækju og öðrum skelfiski fyrir aðila stofnunarinnar, sé þess óskað.

Með lagmeti og niðursoðnum og niðurlögðum sjávarafurðum er í reglugerð þessari átt við hverskyns sjávarafurðir til útflutnings, sem pakkaðar eru í loftþéttar umbúðir, svo sem dósir, túbur og glös og umbúðir úr áli, álþynnum, plasti og öðrum áþekktum efnum, sem tíðkast við þökkum matvæla.

##### 4. gr.

Til að tryggja rekstraröryggi lagmetisiðnaðarins og til að tryggja sérstaklega niðursuðuverksmiðjunum þær umbúðir, sem nauðsynlegar eru, er sölustofnuninni heimilt að gerast eignaraðili að dósa- og umbúðaverksmiðju.

Nú kaupir Sölustofnun lagmetisiðnaðarins hlut í slíkri verksmiðju og skal stjórn stofnunarinnar þá tilnefna fulltrúa í stjórn verksmiðjunnar í samræmi við eignarhlutdeild hennar í fyrirtækinu. Skal hann (þeir) gæta hagsmuna niðursuðu- og niðurlagningarverksmiðjanna við allar rekstrarákvarðanir dósa- og umbúðaverksmiðjunnar.

##### 5. gr.

Til að tryggja rekstraröryggi lagmetisiðnaðarins er sölustofnuninni heimilt að stofna innan sinna vébanda tæknideild, sem veiti stofnuninni og aðildarfyrirtækjum hennar tæknilegar ráðleggingar og aðstoð, bæði hvað framleiðsluna sjálfa snertir og vélbúnað fyrirtækjanna.

##### 6. gr.

Með aðild sinni að Sölustofnun lagmetisiðnaðarins fela atvinnurekendur stofnunarinnar sölu á allri framleiðslu sinni erlendis og er þeim óheimilt að selja vörur sínar úr landi án milligöngu eða heimildar stofnunarinnar. Stjórn stofnunarinnar getur þó ákveðið aðlögunartíma meðan stofnunin er að byggja upp virkt sölukerfi, og skal atvinnurekendur heimilt á þeim aðlögunartíma að annast sjálfir útflutning á vörum sínum að höfðu samráði við stjórn sölustofnunarinnar. Stefnt sé að því, að sá tími sé ekki lengri en 12 mánuðir frá því að sölustofnunin tekur til starfa. Um framkvæmd þessa ákvæðis skal hafa samráð við viðskiptaráðuneytið.

##### 7. gr.

Aðilum Sölustofnunar lagmetisiðnaðarins ber að fara að fyrirmælum stjórnar stofnunarinnar, sem hún setur í því skyni að auka gæði framleiðslunnar. Standist framleiðslan ekki þær gæðakröfur, sem stjórn stofnunarinnar gerir, hefur hún vald

til að synja viðkomandi atvinnurekanda um leyfi til útflutnings á þeirri vöru. Einnig getur stjórnin beitt atvinnurekanda refsiaðgerðum í samræmi við sérstakar reglur þar um, sem settar og samþykktar hafa verið af fulltrúaráði stofnunarinnar.

#### 8. gr.

Fulltrúaráð Sölustofnunar lagmetisiðnaðarins er ráðgefandi um allan rekstur og stefnumörkun stofnunarinnar. Sérhver atvinnurekandi, sem aðild á að sölu- stofnuninni, á rétt á að skipa einn fulltrúa í fulltrúaráðið. Atkvæðisrétt á fundum fulltrúaráðsins hafa þeir atvinnurekendur einir, sem framléitt hafa niðursoðnar eða niðurlagðar sjávarafurðir og/eða flutt þær út á vegum stofnunarinnar á síðustu 12 mánuðum, áður en fundurinn er haldinn. Ákvæði þetta um atkvæðisréttinn gildir þó ekki um fundi fulltrúaráðsins fyrstu tvö starfsár stofnunarinnar.

#### 9. gr.

Sölustofnun lagmetisiðnaðarins tekur sölulaun fyrir þjónustu sína. Stjórn stofnunarinnar ákveður sölulaun að fenginni umsögn fulltrúaráðs og skulu þau miðuð við að standa straum af sölustarfsemi stofnunarinnar.

Sölustofnuninni er heimilt að taka umboðslaun fyrir þær vörur, sem hún flytur inn og/eða útvegar aðildarfyrirtækjum sínum, og skulu þau ákveðin af stjórn stofnunarinnar.

Framlagi ríkissjóðs til stofnunarinnar skal einkum varið til uppbyggingar stofnunarinnar, markaðsöflunar og til að koma upp virku kynningar- og dreifingar- kerfi á íslensku lagmeti erlendis.

#### 10. gr.

Iðnaðarráðherra skipar Sölustofnun lagmetisiðnaðarins 5 manna stjórn til þriggja ára í senn í samræmi við ákvæði 4. greinar laganna.

Stjórnin ræður framkvæmdastjóra, sem er prókúruhafi fyrir stofnunina, ákveður honum starfskjör og setur honum erindisbréf. Skal framkvæmdastjóri annast allan almennan rekstur stofnunarinnar í samráði við stjórnina.

Stjórn Sölustofnunarinnar skal halda reglulega fundi eigi sjaldnar en einu sinni í mánuði. Framkvæmdastjóri situr stjórnarfundi með málfrelsi og tillögurétti.

Stjórnarfundir eru því aðeins ályktunarhæfir, að þar mæti meirihluti stjórnar- innar, en einfaldur meirihluti atkvæða á stjórnarfundi ræður úrslitum mála.

#### 11. gr.

Í samráði við stjórn stofnunarinnar ræður framkvæmdastjóri annað starfs- fólk að stofnuninni og ákveður laun þess og starfskjör.

### B. Þróunarsjóður lagmetisiðnaðarins.

#### 12. gr.

Þróunarsjóður lagmetisiðnaðarins skal starfa í samræmi við 6. og 7. gr. laga um Sölustofnun lagmetisiðnaðarins.

Sjóðurinn er í vörslu og undir stjórn Sölustofnunar lagmetisiðnaðarins undir yfirumsjón iðnaðarráðherra.

#### 13. gr.

Hlutverk sjóðsins er að efla lagmetisiðnaðinn, m. a. með því að stuðla að tækni- legri uppbyggingu iðnaðarins, þróun vinnsluaðferða og vörutegunda og markaðsöflun erlendis.

**14. gr.**

Eigi má verja fé sjóðsins til að ráða bót á rekstrarerfiðleikum eða fjárhagsvanda framleiðanda lagmetis eða til að standa straum af fjárfestingum í framleiðslutækjum eða mannvirkjum þeirra.

**15. gr.**

Tekjur sjóðsins eru sem hér segir:

- a) Öll þau gjöld, sem lögð eru á niðursoðnar og niðurlagðar sjávarafurðir og grásleppuhrogn til ársloka 1977 skv. 3. málslíð 6. gr. 1. um Sölustofnun lagmetisiðnaðarins, sbr. 2. mgr. ákvæðis til bráðabirgða í l. nr. 5/1976 um útflutningsgjöld af sjávarafurðum.
- b) Vextir.
- c) Aðrar tekjur.

**16. gr.**

Framkvæmdastjóri Sölustofnunar lagmetisiðnaðarins er framkvæmdastjóri og prókúruhafi sjóðsins. Gerir hann tillögur til stjórnar sjóðsins um ráðstafanir á fé sjóðsins og nýtingu.

**17. gr.**

Sjóðurinn hefur sjálfstætt reikningshald og skal stjórn hans árlega gera iðnaðarráðherra grein fyrir störfum og stöðu sjóðsins. Skýrsla skal afhent ráðherra um leið og endurskoðaðir reikningar sjóðsins eru lagðir fram.

Drög að framkvæmda- og fjárhagsáætlun sjóðsins skal senda iðnaðarráðherra í upphafi hvers starfsárs.

**18. gr.**

Reikningar sjóðsins skulu endurskoðaðir af Ríkisendurskoðuninni.

**19. gr.**

Reglugerð þessi, sem sett er samkvæmt lögum um Sölustofnun lagmetisiðnaðarins nr. 48 26. maí 1972, staðfestist hér með til að öðlast þegar gildi.

Jafnframt fellur úr gildi reglugerð nr. 128 24. apríl 1973 um Sölustofnun lagmetisiðnaðarins og breyting á þeirri reglugerð, nr. 434 15. ágúst 1974.

*Iðnaðarráðuneytið, 7. október 1976.*

**Gunnar Thoroddsen.**

*Árni Þ. Arnason.*

**REGLUGERÐ**

**um Starfsmannaráð Pósts og síma.**

**1. gr.**

Innan Pósts og síma skal starfa starfsmannaráð, skipað 8 mönnum. Í starfsmannaráði eiga sæti forstjórar aðaldeilda Pósts og síma (fjármáladeild, tæknideild, umsýsludeild og viðskiptadeild) og umdæmisstjóri í Umdæmi I, form. Félags íslenskra símamanna, formaður Póstmannafélags Íslands og einn fulltrúi tilnefndur af Félagi íslenskra símamanna. Auk þess á varamaður formanns Póstmannafélags Íslands, sem félagið tilnefnir, sæti á fundum ráðsins með málfrelsi og tillögurétti.